

Mid-Day Dogri News Bulletin, 19th July 2025

समे — 12:25

<><><><><><>

PM Mangal Pandey

प्रधानमंत्री नरेन्द्र मोदी होरें स्वतंत्रता सेनानी मंगल पांडे होरें'गी अज्ज उं'दी जयंती पर श्रद्धांजलि दित्ती ऐ। श्री मोदी होरें सोशल मीडिया पोस्ट च मंगल पांडे होरें'गी देशै दा महान जोद्धा करार दिं'दे होई उं'दी सराहना कीती। प्रधानमंत्री होरें आखेआ जे मंगल पांडे होरें बरतानिया हकूमत गी चुनौती दित्ती ही ते उं'दी दलेरी दि'आं कहानियां सभ्मनें देशवासियें लेई प्रेरणा दा स्रोत बनी दि'आं रौह्छन। गृह मंत्री अमित शाह होरें बी सोशल मीडिया पर मंगल पांडे होरें'गी श्रद्धांजलि दित्ती ते उं'नेंगी देश भक्ति दा प्रेरणा—स्रोत करार दित्ता। श्री शाह होरें आखेआ जे मंगल पांडे होरें अपनी दलेरी कन्ने 1857 दे विद्रोह गी प्रचंड बनाई दित्ता, जिसनै बरतानिया हकूमत दी नींह ल्हाइयै रक्खी दित्ती ही। एलजी मनोज सिन्हा होरें बी मंगल पांडे होरें'गी श्रद्धांजलि दिं'दे होई आखेआ ऐ जे मंगल पांडे हुं'दा सर्वोच्च बलिदान सदा औने आहली पीढ़िं गी प्रेरित करदा रौह्ग।

<><><><><><>

LG IIM

लेफ्टिनेंट गवर्नर मनोज सिन्हा होरें आखेआ जे जिआं अस 2047 तगर भारत गी इक विकसित राष्ट्र बनाने दी बत्ता पर अगड़े बधै करने आं असेंगी चाहिदा ऐ जे अस बेह्तरी ते खुशहाली गी जकीनी बनावै। एलजी होरें एह गल्ल भारती प्रबंधन संस्थान यानि आई.आई.एम. जम्मू च 5 दिनें दे सिखलाई कार्यक्रम दे समापन सत्र गी संबोधन करदे होई आखी। श्री सिन्हा होरें अपने संबोधन च आईआईएम जम्मू दे विद्यार्थिं गी आखेआ जे ओह लोकें दे जीवन च सकारात्मक बदलाव आह्मने ते समावेशी विकास लेई जोर लान ते इस गल्लै गी जकीनी बनान ते समाज दे कुसै वर्ग गी पिछे नेई छोड़ेआ जा। एलजी होरें आखेआ जे प्रधानमंत्री नरेन्द्र मोदी हुं'दे नेतृत्व तैह्त्त जम्मू—कश्मीर, शिक्षा ते नमिं काह्डें दे इक बड्डे गढ़ दे तौर पर उभरियै सामने आया ऐ। इस मौके पर एलजी होरें तेजस स्पोर्ट्स कम्पलैक्स दा बी उद्घाटन कीता।

<><><><><><>

DyCM - CII

उपमुख्यमंत्री सुरिन्दर चौधरी होरें कल श्रीनगर च आयोजित कन्फैडरेशन ऑफ इंडियन इंडस्ट्री यानि भारती उद्योग महासंघ दी सैलसफा ते खातिर—तवज्जो सरबन्धी उत्तर क्षेत्रीय कमेटी दी पैहली बैठक

दी प्रधानता कीती। इस बैठक च सैलसफा गी परतियै बत्ता पर आहनने ते जम्मू कश्मीर गी वैश्विक सैलसफा दे इक बड्डे केन्द्र दे तौरा पर स्थापत करने बारै चर्चा कीती गई। बैठक गी संबोधत करदे होई उपमुख्यमंत्री होरें जम्मू कश्मीर च सैलसफा खेत्तर दे विकास लेई केई मुख् बिंदुएं उप्पर लोह पाई। उनें आखेआ जे सरकार जम्मू-कश्मीर गी पूरा ब'रा सैलानिएं दे आकर्षण दा केन्द्र बनाई रखने लेई वचनबद्ध ऐ। श्री चौधरी होरें सी.आई.आई. गी गुजारिश कीती जे ओह एह्दे लेई सरकार दा सैहयोग करन।

<><><><><><>

Rana - AIFOF

ऑल इंडिया फारेस्ट आफिसर फैंडरेशन दे औह्द्वेदारें कल श्रीनगर आह्ले सिविल सचिवालय च जंगलात मंत्री जावेद अहमद राणा हुंदे कन्नै मलाटी कीती। जंगलात मैह्कमे दे प्रिंसिपल चीफ कंजरवेटर सुरेश कुमार गुप्ता हुं'दी अगुवाई च गेदे इस प्रतिनिधिमंडलै मंत्री होरें'गी जानकारी दित्ती जे वन शहीदी दिवस 2025 दा मुख् समारोह 11 सितम्बर 2025 गी श्रीनगर च लोआया जाह्ग। इस समारोह दा मकसद जंगलात कन्नै सरबंघत ओकड़े लोकें दे बलिदान गी चेता करना ऐ जि'नें ड्यूटी करदे होई अपनी जान गोआई ही। मंत्री होरें इस राश्ट्री स्तर दे समारोह गी श्रीनगर च आयोजित करने आस्तै फैंडरेशन दी सराहना कीती।

<><><><><><>

CS Disaster Response

कुदरती क्रोपिएं ते होरनें आपदाएं दरान कारवाइएं ते उं'दे लेई तैआरिएं बारै जम्मू-कश्मीर प्रशासन आसेआ इक बशेश कार्यशाला दा सरिस्ता कीता गेआ जेह्दा विशे-सार हा "इंसीडेंट रेस्पॉन्स सिस्टम" यानि घटना पर प्रतिक्रिया ते कार्रवाई लेई बवस्था। इस कार्यशाला च मुख् सचिव अटल डुल्लू, गृह ते आपदा प्रबंधन सरबंघी प्रधान सचिव चन्द्राकर भारती ते आपदा प्रबंधन सरबंघी राश्ट्री सतह दे केई माहिर बी शामिल होए। अपने उद्घाटनी भाषणै च मुख् सचिव होरें नागरिकें ते संस्थानें च आपदाएं कन्नै निब्वड़ने लेई तैआरियां करी रखने दे चलन गी विकसित करने पर जोर दित्ता। जम्मू कश्मीर दे सरबंघै च बोलदे होई अटल डुल्लू होरें आखेआ जे जम्मू-कश्मीर च केई चाल्ली दे संकटें दी शँका बनी दी रौंहदी ऐ जि'दे च छड़ी कुदरती क्रोपियां गै नेई सगुआं होर केई चाल्ली दे संकट ते चुनौतियां बी शामिल न। मगरा मुख् सचिव होरें एह् बी आखेआ जे हर इक क्रोपी, असें'गी सिक्खने दा इक इक सबक दि'दी ऐ। मगरा आईआरएस दे बारै च जानकारी आली इक कताब बी जारी कीती गई।

<><><><><><>

Accident Jhajjar Kotli

जम्मू दे झज्जर कोटली इलाके च अज्ज पेश आए दे इक जात्तरी बस, हादसे दा शिकार होई गई। उधमपुर थमां जम्मू बक्खी आवा'रदी एह तेज रफ्तार बस शिड़कै परा हेठ रूलकी गई। हादसे च 12एं जनें दे जख्मीं होने दी फिलहाल जानकारी ऐ ते इब्बी दस्सेआ जा'रदा ऐ जे किश जख्मिं दी हालत माड़ी ऐ। उ'आं इस सरबंधे च होर ब्यौरे गी अजे बलगेया जा'रदा ऐ।

<><><><><><>

Amarnath Yatra

सख्त सुरक्षा बंदोबस्तें हेठ अज्ज बड्डलै जम्मू दे भगवती नगर आहले यात्री निवास आधार शिविर थमां 6 जहार 365 अमरनाथ श्रद्धालुएं दा 17मां जत्था कश्मीर घाटी लेई रवाना होआ। लौहकी-बड्डी कुल 211 गडिडएं दे काफले च सोआर इ'नें अमरनाथ श्रद्धालुएं च 4 जहार 690 मर्द, 1 जहार 499 महिला, 41 न्याणे, 108 साधु ते 27 साध्वियां बी शामिल न, जेहड़े 'बम बम भोले' दे जयकारे लांदे बड्डलै मुंह न्हरे जम्मू दा रवाना होए। इ'दे चा 3 जहार 514 श्रद्धालु पहलगाम आले रस्तेया ते 2 जहार 851 श्रद्धालु बालटाल आहले रस्तेया पवित्र गुफा च मत्था टेकने लेई जाउन।

<><><><><><>

Div.Com

जम्मू दे डिवीजनल कमीशनर रमेश कुमार ते आईजीपी भीम सेन टूटी होरें शरू होने आली श्री बुड्डा अमरनाथ यात्रा 2025 दे सुचारु ते सुरक्षत संचालन गी जकीनी बनाने लेई प्रबंधे दी समीक्षा कीती। इस बैठक च पैरा मिल्द्री फोर्स, जम्मू कश्मीर पुलस ते सिवल प्रशासन दे वरिष्ठ अफसरें हिस्सा लैता। इस बैठक च सिविल सोसायटी दे नुमायंदें बी हिस्सा लैता ते अपने सुझाह सांझे कीते। यात्रा दा पैहला जत्था 28 जुलाई 2025 गी जम्मू दे भगवती नगर थमां रवाना होग ते पूरी सुरक्षा बंदोबस्तहेट पुंछ दी मंडी तैहसील आली बक्खी अगगे बधोग। डिवीजनल कमीशनर होरें अधिकारिं गी निर्देश दित्ते जे ओह तीर्थयात्रिं दी सहूलत लेई इक हैल्पडैस्क ते रजिस्ट्रेशन काउंटर भगवती नगर ते रेलवे स्टेशन उप्पर स्थापत करन।

<><><><><><>